

Canghsae Canghfwen Daeuj Doxcomz Fwencuengh Eu Ok Cingz Minzcuz

——Geiq “Riengz Gou Hag Sawcuengh”(Bi 2016 Geiz Daih'it) Beizyin Gietnieb

歌师歌手来相聚 壮歌歌唱民语情

——南宁市“跟我学壮文”(2016年第1期)培训班结业

□ bonjbauq gicej: Couh Yi/周玉 Cau Dwzfeih/赵德飞 dunghsinyenz: Veiz Yinjsenz/韦尹璇



▲ Beizyinbanh boux ceiq oiq cingz eu fwen.

▲ Song boux yozyenz cingq doiq fwen.

◀ “Riengz gou hag Sawcuengh” beizyinbanh gietnieb denlij.

8 nyied 29 hauh banhaet, Namzningz Si bi 2016 geiz daih'it “riengz gou hag Sawcuengh” beizyinbanh guh 8 ngoenz haenx swnhleih gietnieb. Swcigih Minzyijveij Yingyungcu、Namzningz Si Minzcunghveij、Namzningz Si Minzyijveij、Vujmingz Gih Minzcunghgiz (Minzyijgiz) daengj mizgven danhvei lingjdauj nem gyoengq yozyenz geiz beizyinbanh neix camgya le gietnieb denlij.

25 boux yozyenz daj Hwngyen、Lungzanh、Cinghsiu、Vujmingz daengj 8 aen yienhgi haenx ginggvaq camgya “riengz gou hag Sawcuengh” beizyinbanh, youq gietnieb denlij seiz, gak boux yozyenz cungj gaenxmaenx langhbaij gij cingzgoj 8 ngoenz neix hag ndaej haenx, doenggvaq gij fuengsik sikhaek eu fwen, sikhaek bien fwen, yungh fwen cienz cingz, yungh fwen gangj eiq.

“Yungh fwen daeuj gyau youx, doxcomz youq Vujmingz; Sawcuengh ngamq hag rox, simcingz angqvauvau. Doxgyau gvangq fouz henz, Vahcuengh cienz Bazgei; Vah bonjdieg gyaunde, hag ndei beij gim bengz.” Boux duiyoh ganbu Luz Gveivaz daj Lungzanh Yen daeuj haenx, youq gwnz gietnieb yizsi, doenggvaq song hot fwen gag bien gag caux gangjok le gij cingz gikdoengh doiq camgya baez beizyinbanh neix.

“Ceik cij miz soundaej, hai bak cij rox eu fwen; gou youq gizneix hag Sawcuengh, hag ndaej lai youh ndei.” Luz Yinlij boux nienzgeij ceiq oiq camgya baez beizyin neix hix aj bak couh baenz fwen, yungh sing fwen eu

ok gij simndaej hagsib bonjfaenh.

29 hauh banringzgvaq, gyoengq yozyenz caeuq gyoengq lauxhangz daengz Vujmingz Gih Lohgyanghbinh yienhciegz yawjgonz le “ndwen hawfwen Vujmingz” hozdung.

Gyoengq lingjdauj caeuq lauxhangz haengjdingh le gij fuengsik cauxmoq caeuq gij cingzgoj aeundaeg geiz beizyinbanh neix, caiqlij maqmuengh doenggvaq baez beizyin neix, mboujduenh cungjez gingniemh, coglaeng dawz gij gingniemh ndei doigvangq daengz gaengx gih gak dieg.

Namzningz Si Minzyijveij cujyin Moz Swhhungz naeuz, maqmuengh gyoengq yozyenz aeu baez hagsib neix guh diemj hwnjdin moq、doenghlig moq, youq diegvih guhhong bonjfaenh vih doihengz Sawcuengh ok rengz, vih swnjcienz baujhoh hwngfat vwnzva conzdungj minzcuz maenhndei caeuq cauxguh lai cungj vahgangj saedceij huzndei guh ok gungyen hungloet!

Ciuq cam rox, Namzningz Si Minzyijveij yaek laebdaeb miz bouhloh doicaenh gij hong gvendaengz haenx, caemhcaiq youq bineix 9 nyied、10 nyied lienздаemh banh 2 geiz beizyinbanh. Daengzseiz yaek youq Namzningz Sinhvwz Vangj vangcan nem veihsin、Namzningz Yizbau、Namzningz Vanjbau daengj sinhvwz meizdij daeng mizgven beizyinbanh ciuseng saenqsik; beizyin yaek doiq ndawbiengz ciusou yozyenz, lij yungh gij fuengsik beizyin mbouj aeu cienz, laebdaeb mizyauq doicaenh gij hong doigvangq vah saw minzcuz daengx gih hwngfat.



▲ Yozyenz ndang daenj buhvaq minzcuz camgya “ndwen hawfwen Vujmingz” hozdung.



▲ Geij boux yozyenz hab'ingi.



▲ Yozyenz hwnjdaz “ndwen hawfwen Vujmingz” eu fwen.



▲ “Ndwen hawfwen Vujmingz” nauhyied raixcaix.



▲ Youq “ndwen hawfwen Vujmingz” ciengzdieg.